

四庫全書

集部

欽定四庫全書

集部

文忠集卷

四十七至  
五十

詳校官庶吉士<sub>臣</sub>李傳熊

主事臣呂雲棟覆勘

總校官進士<sub>臣</sub>楊懋珩

校對官學正<sub>臣</sub>李巖

謄錄監生<sub>臣</sub>任嘉春

欽定四庫全書

文忠集卷四十七

平園續稿七

宋 周必大 撰

題跋

跋後漢樊常侍碑

右後漢樊常侍碑歐陽文忠公已有跋今其文章可讀  
以永壽四年二月卒是年六月改元延熹八月丁酉制  
詔湖陽長劉操追授騎都尉印綬至二年十一月其子

勒文碑石俾不失墜而趙明誠金石錄乃以爲元年八月蓋因贈官而不考立碑在後也慶元丙辰正月癸卯平園老叟周某書而歸之曾氏

跋歐陽堯祠碑跋

堯祠碑在集古錄爲第七百九十一卷左氏傳云巡羣屏攝正義謂束茅爲之國語云屏攝之位注以屏爲屏風攝如耍扇二義雖殊其指主人祭祀之所則一也今跋以攝爲懾或疑其誤豈得漢碑亦以爲懾豈古人傳

寫不同抑事神之際當屏息懾伏以致其恭或爲屏蔽  
之屏攝以威儀之攝也廬陵祠曹趙彥法示此跋敬題  
其下爲輕改古書者之戒慶元丙辰正月癸卯周某題

題楊謹仲芍藥詩後

淳熙甲午奉祠廬陵三月十七日會同年楊謹仲周孟  
覺賞芍藥嘗櫻桃謹仲有詩余次韻云清晨自掃落花  
廳小甕新菊竹葉清簪盍莫辭過陋巷臚傳相與記彤  
庭皆翻紅藥曾重見

僕兩直西掖

勅賜朱櫻亦屢經老去飄

零無此夢詩來吟詠有餘馨今二十有三年二公墓木  
已拱因彭君仲識携謹仲帖相過且索舊詩爲之悵然  
此花最盛於太和而以紅都勝黃樓子爲冠如牡丹之  
姚魏也黃樓歲得之都勝者邑中惟一二家有種惜不  
與人去年予荅鄉貢進士陳恂二小詩云芍藥名先記  
鄭風那因嘉木辯雌雄韓魏王以芍藥爲花后姚黃後出今亡矣  
合把黃樓列上公六一先生舊帥揚分寧太史尹西昌  
只緣未識紅都勝如杜詩中闕海棠蓋許元寄歐陽公

詩云芍藥瓊花應有恨維揚新什獨無名公答云偶不  
題詩便怨人山谷宰太和時篇詠甚多未嘗及此花今  
謹仲帖云花出怨語與古事相類併錄惡語于後慶元  
丙辰正月戊申周某書

跋胡忠簡公和王行簡詩

予嘗評胡忠簡公詩有不可及者三用事博而精下語  
豪而華一也士子投獻必用韵酬答雖百韵亦然蓋愈  
多而愈工二也此篇和王君行簡年七十五長歌小楷

與四五十人無異三也行簡世家臨川志大而瞻於文  
久從公遊其人亦可知矣慶元丙辰四月七日

題羅起宗廟食碑

紹興二十二年秋贛兵環攻南安以石壓卵未足喻其  
危稅官羅君起宗獨冒白刃三入賊壘說之使去城賴  
以全當時雖不與賞今乃附享神祠夫人爵不過顯一  
時廟食自當傳百世羅君可以無憾而其子孫亦足自  
慰矣慶元二年四月十一日



跋王民瞻送胡邦衡南選詩

有澹菴壓嵩岱排淮泗之舉然後可以發盧溪穿天心  
透月脅之詩不如是不稱二絕澹菴授之從弟廉夫鶚  
廉夫復授其子渙所謂文獻相承衣鉢單傳者若能刻  
石人授之本則法周沙界矣慶元丙辰四月十四日

題京仲遠與周孟覺帖

孟覺與予同宗同郡同年者忝從班每有哀窮悼屈之  
心而未嘗効拔茅連茹之力孰知其子乃能于三十年

後持相國帖自歸于光範乎愧嘆而書卷尾其時日則誠齋題字之信宿慶元丙辰四月二十三日

御書樂毅論跋

臣伏讀高宗皇帝翰墨志云魏晉以來筆法無不臨摹又云每得右軍書手之不置初若食蜜少甘則已味如橄欖真味久愈在也故尤不忘于心手紹興三四年間嘗臨羲之所書樂毅論以賜樞臣韓公肖胄之世傳高氏石本間節三十餘字得非御府別藏真蹟自不同耶

後六十有三年樞臣之孫前韶州守臣亞卿示臣使記  
歲月恭惟龍鸞飛動衆所共窺天日清明臣何敢繪慶  
元丙辰四月二十八日具位臣周某某謹再拜稽首書其  
後

題呂獻可墓誌

呂公獻可以熙寧四年五月卒八月葬時王荊公正在  
相位司馬文正公誌銘不斥其名不沒其實荊公見之  
亦無所發其怒前謂樞密副使者陳丞相賜叔也方以

憂去牽聯潛其姓名可謂深得史法矣是時太僕卿劉仲通自請書丹而命其子忠定公器之秉筆斯文既出其誰不知邵伯溫乃謂仲通初雖有請見文復遲回不敢器之代父書之仲通又勸呂氏諸子勿摸本恐非三家之福按國史仲通剛方人也押伴夏人折正其章服奉使却秉常寶貨歸論不宜輕用兵因旱陳新政不便者五事又上書論人主不可輕失天下心是豈徇時畏禍者哉設有前却之意器之亦安得強其父而陷之罪

也大抵邵氏聞見錄頗多荒唐凡所書人及其歲月鮮不差誤因是略爲之辨此碑當日號三絕謂其人與文及書也真蹟藏名相劉忠肅公玄孫無欲家嘗以示忠定公曾孫孝昌孝昌念祖之心切將傳之副墨而力不足會湖南部使者吳仲權鑑助其費久之乃能成是以傳遠矣慶元丙辰五月九日具位周某謹識

跋張仲宗送胡邦衡詞

長樂張元幹字仲宗在政和宣和間已有能樂府聲今

傳于世號蘆川集凡百六十篇而以賀新郎二篇爲首  
其前遺李伯紀丞相其後即此詞送客貶新州而以賀  
新爲題其意若曰失位不足弔得名爲可賀也慶元丙  
辰五月十三日題

題蔡忠惠公帖

某之先君秦國公平生喜學蔡忠惠公書家藏京師舊  
石刻兩卷真行草畢備妙絕一世乾道間公曾孫戶部  
尚書洸來守廬陵摹置郡齋雖轉寫失真而典型故在

今公玄孫戶部侍郎戡出帥豫章復刻公遺墨俾某記  
其歲月恭惟高宗皇帝天縱游藝嘗評公書爲本朝諸  
臣之冠且有入格律度驛騶之褒天監在上誰敢措詞  
惟公當神廟天聖八年擢進士甲科名在第十後百三  
十有七年歲在丙戌孝宗龍飛策士侍郎復踐世科名  
次若合符節詩云惟其有之是以似之慶元二年五月  
二十二日

題陳忠肅公尊堯集稿

陳忠肅公以元符庚辰入諫省力論蔡京姦邪弟卞妄引王安石日錄詆誣神廟未幾出守無爲軍明年改元靖國入爲都司上書責曾布併及私史事復出海陵又明年當崇寧壬午貶徙廉州此稿蓋當時筆也書成名曰合浦尊堯集繼爲四明尊堯集其詆蔡氏愈力不翅數萬言厥後果有靖康之亂公可謂忠也已矣可謂明也已矣真蹟在公壻前衡陽太守蕭君懋德家衡州之孫必得携以相示因爲記其歲月併仍錄國史本傳使



併藏之慶元二年五月二十八日

跋歐陽文忠公誨學帖

歐陽文忠公年二十有三以玉不琢不成器賦魁國子監其後十六年而次子奕生奕字仲純胡文恭公性倜儻文章豪放尤長于詩多至三百篇公以其質美書此以勵其學惜乎得年纔三十四位不及顯然熙寧末鄭俠得罪凡通問者皆獲譴仲純獨傾貲送之其大節如此可謂不愧先訓非學力乎帖已刻而真蹟今藏郡人

胡祗家祗字仲本亦佳士慶元丙辰六月庚戌

跋徐夫人所書華嚴經梁武懺

鬱林蔡侯子羽故母徐氏三衢人宣和間刑部侍郎諱敷言之女潛心內典學虞世南書嘗手寫華嚴經梁武懺皆終部帙所謂婦人身得度者其子將藏是書于名山求余一言余謂夫人爲善如此郗氏之業在所不論二經果報寧復唐捐華嚴經云南方國有長者妻名曰善慧見佛神力心生覺悟法華經云比丘尼憍曇毗得

佛授記後名光相如來予知夫人此念不斷盡未來世當證二說豈止資其冥福而已慶元丙辰六月丙寅

跋胡忠簡公論和議稿

紹興戊午胡忠簡公三十有七以樞密院編脩官上書論和議此其稿也時長子方生未幾南選公知後禍叵測惟從姪昌齡字長彥賢而可托故以稿屬之今五十餘年矣昔顏魯公與魚朝恩論坐位帖稿摹本已數百載人爭傳寶公之所論豈止坐位而其心畫端勁實法

魯公自當並傳于百世慶元丙辰六月

題羅煒詩稿

友人永豐羅永年長子煒天才雋敏而苦于學遂至隕  
生予讀其詩稿而悲之永年求余一言昔人謂詩能窮  
人或謂非止窮人有時而殺人蓋雕琢肝腸已乖衛生  
之術嘲弄萬象亦豈造物之所樂哉唐李賀本朝邢居  
寔之不壽殆以此也今于羅氏子尤信慶元丙辰八月  
六日平園老叟周某書

跋焦伯強與潘簡夫帖

歐陽文忠公贈焦伯強詩云焦生獨立士勢利不可恐  
又云皎皎寒泉冰其清正如此余裛彙文忠公集于書  
簡門得公與伯強帖凡十有六意愛之厚期待之遠情  
見乎辭今觀伯強遺永嘉潘簡夫十六帖淵源蓋有自  
矣簡夫諱約後爲伯強壻三子文饒字民則文孝字少  
穎紹興間相繼擢第文虎字叔山亦嘗魁薦鄉評推焉  
少穎之子檜今爲臨江軍職官奉檄至廬陵出示此軸

爲題其後慶元丙辰中秋平園老叟周某

跋呂伯恭日記

黃太史晚謫宜州自崇寧四年起但凡風雨寒暑親舊  
徃復以至日用飲食之類皆繫日書之名曰乙酉家乘  
止八月晦九月則易簣矣呂太史抱病東陽亦有日記  
起淳熙庚子春盡辛丑七月壬寅其明日遂卒蓋絕筆  
也方病時出入起居雖不逮山谷而編大事首周敬王  
脩讀詩記自唐無孜孜課程所謂造次必於是者兩

賢相去七十餘載何其相似也意長日月短悲夫慶元二年八月二十六日

跋廖中精記

天錫九疇一曰五行凡天地人有形則有數有數則囿於五行是善卜筮者預能測知人居其間又顯顯可推者傳不云乎死生有命富貴在天豈術者之臆說哉春秋戰國前善相者多若推祿命則盛于漢賈誼譏司馬季主曰高人祿命以悅人心矯言禍福以規人財後世

又可知已今士大夫至田夫野老人人喜於談命故其書滿天下清江鄉貢進士廖中伯禮連舉未第乃刻意於此會粹數十家之說章分件析考驗得失較量深淺成精記三卷携以示余余謂五行所寓有常焉有變焉常易推也迹也變難推也理也自非心通意悟不足以盡此古稱善其事者莫如李虛中萬端千緒叅錯重出學者就傳其法初若可取卒然失之茲豈易哉廖君歸矣苟因書悟理則將如由基之射百發而百中不然讀



齊侯之糟粕其可否未可知也

題謝昌國式華堂記

淳熙甲辰今太皇太后慶七十於德壽宮推恩四海廬  
陵進士歐陽鉞字仲授以高年賜初品官其子碩取訓  
辭式華其老之言揭名于堂工部謝尚書謬實爲之記  
歲星一周當慶元丙辰十月三日今皇帝奏上壽聖隆  
慈備福光祐太皇太后冊寶于慈福宮聖筭八十有二  
矣於萬斯年慶典未央鉞也又將增秩之寵載新斯堂

以延賓客其有日矣是月壬戌平園老叟周某書

題廬山西林道場碑

右隋廬山西林道場碑文歐陽率更撰而不云何人書  
要當出于一手昔唐韋絢錄劉禹錫嘉話載率更行見  
索靖所書碑下馬布毯坐觀三宿而後去又云率更不  
擇紙筆皆能如志惟其好古如前說之勤是以肆筆無  
不臻妙理當然矣三門銘逸姓名亦知名筆也慶元丙  
辰十一月己卯平園老叟周某書

題裴晉公撰李西平神道碑

右裴晉公撰李西平神道碑以校江浙閩唐文粹本大率傳寫脫謬且經改易不暇徧舉姑言其甚者乾元初立功武都邦人咸服具以狀聞而諸本盡作具狀以聞何俗弱也乘墉壑如通道殆有二義當謂士卒賈勇升高陟險如履平不然以而爲如猶春秋書星隕如雨也今衆本直改作而通道或增一字爲軌道于是下句若臬鏡而清宮亦添一禁字按周禮秋官哲族氏掌覆天

鳥之巢鄭氏讀如槌碑蓋用此若字而諸本盡改爲磔  
尤更淺陋古書日壞俗本日多此予所以撫卷三嘆也  
慶元丙辰十一月己卯

題歐陽文忠公跋賽陽山文

太和九年賽陽山文在集古錄第五百四十三卷自唐  
乙卯歲至本朝嘉祐己亥六賢同觀特蓋二百二十五  
年又至熙寧辛亥一紀之間文忠公已有存亡今昔之  
歎後百一十五年爲淳熙乙巳而亡友劉子澄記之今

十三年子澄墓櫨森然矣重可歎也慶元丙辰十一月  
平園老叟周某書題而歸之劉氏

跋歐陽文忠公與裴如晦帖

右歐陽文忠公與裴如晦帖如晦名煜慶歷六年魁南  
省擢乙科嘉祐末以秘閣校理守潤州此公當時答書  
公文集書簡門先有嘉祐五年一帖而集古錄前漢雁  
足銘跋亦載如晦與公別幅至治平四年如晦以集賢  
校理判三司戶部勾院卒此帖藏紫薇朱公家作跋在

龍興二年後三十三年朱公之子軾字叔止攜以相示  
既刻附文忠公集又爲記其大略慶元丙辰十一月五  
日

題張志寧所藏東坡畫

蘇文忠詩云空腸得酒芒角出肝肺槎牙生竹石森然  
欲作不可留吐向君家雪色壁英氣自然乃可貴重五  
日一石豈知此耶慶元二年十二月一日

跋老泉所作楊少卿墓文

同年臨江楊謹仲諱愿徃爲廬陵郡博士嘗爲余言乃  
祖中大夫諱申在京師從老泉蘇公明允乞曾祖光祿  
少卿諱克從墓文又得王廣淵書丹時君卿篆額今有  
石本留先塋頗恨未之見也謹仲下世之十三年其長  
孫光祖始軸以求跋予生晚不知中大夫何如人然碑  
成于嘉祐七年秋而刻于英宗治平之初元是時三蘇  
名震京師廣淵直集賢院爲群牧三司判官君卿自藩  
邸以藝文被幸由奉禮郎換內殿承制三人雖不同同

爲當世所貴非中大夫好學而篤志則其文其書豈易得哉韓退之謂唐人欲銘其先必得三服予謂楊氏此碑非三難乎厥後謹仲旣以學行爲鄉先生今諸孫又表而出之不隕其業將無愧于老泉之辭矣慶元二年十二月二十一日

跋宋待制暎寧軒自適詩

右徽猷閣待制宋公詩稿四十一篇皆紹興間寓鍾陵時投贈帥漕及與當世名勝唱酬也嗣孫文林郎江陵



府觀察推官文成將伐石刻置家塾屬某一言惟本朝承五季之後詩人猶有唐末之遺風迨楊文公錢文僖劉中山諸賢繼出一變而爲崑體未幾宋元憲景文公兄弟又以學問文章別成一家藻麗而歸之雅正學者宗之號爲二宋公蓋元憲曾孫字景晉名載詩序中東坡先生詩云吾觀二宋文字字照縑素淵源皆有考竒險或難句後來邈無繼嗣子其殆庶此六語者今可復施之公壬午歲某在後省嘗草公贈官制云學知守其

家亦此意也慶元丁巳正月戊戌前進士周某書

跋李先之禮記義

右章貢先生李公先之作禮記義四首前兩道紹聖元年省元程文次兩道元祐八年監元程文是時兼用經義詩賦取士公賦已盛行于四方近德安府贛州刻公全集亦復收入獨經義不傳予幼從公族人養素處士學手自抄寫徃歲因吉水高君德懋留意是經命甥李驥騰本遺之今德懋之子誼携以相示爲題其後不然

將莫知其爲誰之文也

跋陳剛中石材廟詩

陳剛中字彥柔胡忠簡公同年進士其貶安遠宰也予適在贛識之豐肌便腹骨不勝肉而安遠荒僻瘴癘特甚汲水置器中須臾墨色以故仕者多死士大夫固憂公不能生還未幾果然其後湘中有著紹興正論者公姓在焉且云其妻無所歸削髮爲尼未知信否謂公以辛酉歲貶則悞矣當以庚申爲正

跋臨江軍劉昌詩之父青詞稿

眉山唐子西父病篤母史氏祈以身代死已而母死父  
生彼特伉儷之情爾或不容于兩全若劉氏兄弟則孝  
於事親也其感格宜哉

題胡邦衡侍郎撰胡從周寺丞誌文

金昆玉友無復二難鴻筆瓌辭有華三絕繡篋中之遺  
蹟附宰上之豐碑解白墮之嘲修馬隔世圓朱褒之夢  
恍若平生偉詩禮之傳芳森兒孫其競爽尚襲藏于手

澤期光紹于寶章

白墮朱褒皆一時實事

題張魏公與晁升道帖

右魏國忠獻張公遺晁升道十四帖其半親表也升道諱升之南渡寓盱江寶文閣學士劉弘道資深見而奇之薦于魏公自是爲公客公居潭連音問不絕凡國太晚年之起居欽夫早歲之學識皆于辭翰中及之最後謂人事無窮與天地相終始欲其撥置以全精神期之者至矣今公季子龍閣尚書開鎮豫章希父兄之勛業

升道之孫子毅携公手澤往候柴戟因爲記其本末慶  
元丁巳十月丁丑

題呂紫薇與晁仲石詩

晁氏一姓文獻相續殆無它楊號本朝盛族仲石諱公  
慶紹興初與范顧言曾表父同學詩於呂紫薇故得是  
詩乾道元年平江守沈公雅刻紫薇集二十卷以歲月  
爲先後此篇在末卷中蓋暮年所作也仲石之子子毅  
以示周某敬書其後慶元丁巳十月丁丑

題李龍眠山庄圖

龍眠居士博學嗜古志尚清遠筆端餘力溢而爲畫王  
荆公雅重之數贈以詩又從蘇黃諸公遊蓋文與可一  
等人也龍眠山庄圖匹休輞川張右丞達明鴈峰談錄  
云正本爲中貴梁師成取去今所臨摹蓋初本也居士  
出處具蔡啟所作誌文一子諱碩字天老湖南提舉常  
平是生四子予識其二長諱琥字西美通敏善議論終  
于郡倅李曰瑜字季周嘗爲理掾能傳乃祖筆法予屢

得之今亡矣西美之孫各出此軸請予題其後慶元三年十月壬午平園老叟周某

跋張魏公與彭子從書

尚書郎彭公子從德厚如璞玉歲寒如喬松紹興癸酉守零陵郡故相張忠獻公謫居在焉竭誠盡禮不以燥濕改其度已而按刑交廣總賦沔鄂當時士大夫皆謂用未極也今觀忠獻帖其賢可知若子若孫得守家法雖由積善使然亦忠獻相勉爲學擇師友之助也慶元三年十月日



題陸本益齋記

乘成尤爲陸本仲因作益齋記具論損益之義詳矣仲因復求予跋殆難措辭抑聞之蘇文忠公爲學務日益此言當自程爲道貴日損此理在旣盈請以是詩爲齋之銘立爾常心毋欲速成惟直諒多聞之是親可以致身可以揚名豈止一第而已慶元三年十月日

題周洽所藏南唐牒訴

右南唐吉水縣鄉貢進士周洪誼牒訴七幅考之史氏

五代僭偽諸國獨江南文物爲盛然每歲科舉取人甚少多用上書言事拜官惟廣順二年始命江文蔚知貢舉放進士廬陵王克正等三人而止雖舉子以少爲貴然鄉坊保甲父子難乎俱免累政縣判如此蓋優之家傳二百四十年八世孫洽來求跋語按周顯德五年歲在戊子即李璟保大之十六年方改元交泰而世宗盡取淮南畫江爲界上下震懼謀徙豫章已而削去帝號奉周正朔故第一幅稱顯德六年越明年庚申太祖

皇帝受禪辛酉璟南徙而殂煜嗣位于金陵後十三年  
歲在甲戌王師弔伐明年乙亥國除士民始避本朝廟  
諱其名上一字適同宣祖又明年十月太宗皇帝即位  
其下一字復犯御名故前牒皆名弘義最後一牒乃改  
洪誼實開寶九年之十一月至十二月則改元太平興  
國矣先是公私狀式例以牒件謹牒爲文元豐四年十  
一月詳定官制重頒新式此其所以異于今也洽字季  
宏不隕世業豈但遺蹟是藏固將起家以大其門老夫

雖髦尚或見之慶元丁巳冬至日

題浮雲居士曾達臣雜志後

姓氏書曾氏望廬陵本朝大江以南清源南豐兩族皆  
出宰執侍從嘗通譜系其後贛之雩都則叔夏尚書天  
猷吉甫侍郎兄弟繼爲禁路之英惟廬陵一族文獻相  
承無慮數十人而未及三郡之顯今浮雲居士達臣有  
博古通今之學偶遺于科舉有知機應變之才不白于  
功名緒餘著書追跡前輩向使盡發胸中之所蘊其成

就宜如何哉是生諸子才學俱茂或仕于小官或貢名  
天府而仲氏無逸策第太常典中秘書爲尚書郎羣從  
孜孜爲善方競爽迭興而未艾視前三家何患不及特  
時有先後爾况猶子無玷嘗以奉使朔方假兩大制歸  
而勸講修注備膺寵章是固爲之兆矣姑少徐之慶元  
丁巳冬至日

題至聖文宣王三十八代孫孔仲良唐貞元以  
後告身石刻

自古推尊孔子莫如孟氏既答公孫丑曰自生民以來  
未有孔子又引宰我子貢有若之言曰夫子賢于堯舜  
遠矣生民未有句言至再三蓋然之也趙岐乃謂前聖  
不得相踰門弟子之言太過是豈知孟子之意哉及唐  
韓愈謂天子至郡邑通祀孔子北面拜跪禮踰社稷彼  
堯舜雖得其位而不得常祀社稷雖得常祀而無天子  
北面拜跪之禮故云不得位而得常祀無盛于孔子是  
爲遠過堯舜之效然後孟子之意明矣某竊謂虞賓三

恪隨運推移孰有世世襲封如衍聖公者陽城蒼梧間  
置守塚孰有廟宅世祀萬乘臨拜如孔林者以此推之  
將歷千萬世與天地相爲終始何但生民未有而已今  
莆田幸因賢者爲更版籍立四十九世孫之戶刻唐告  
於縣齋他日良二千石或能推擇嗣人世居學宮使先  
聖苗裔益勸毋怠於以彰皇朝崇儒重道之美又盡善  
也慶元三年十一月日

題俞洪所藏滕元發與俞退翁詩

四朝國史於遺逸中立俞退翁傳大槩用孫莘老所作墓表惟自西川召爲御史力辭不拜墓表但曰以闕員召傳乃謂王介甫藉其清望使擊故老夫清德安肯妄發介甫用人寧不察此竊疑滕元發嘗倖湖州退翁郡人熟知其賢觀所贈詩帖即可知矣當熙寧元年神廟待元發方厚擢爲中丞必舉臺屬退翁之召或以其薦是歲十二月元發改翰林明年春介甫得政素惡元發出之于外知幾而退是乃所以爲退翁况舉主補外自



應隨罷耶墓表不書其由革老亦嘗攻元發故也慶元  
丁巳十一月望退翁玄孫洪相過出示元發詩翰妄意  
如此來者或有考焉退翁子孫甚盛是則豐積嗇取之  
報洪醞藉疏通稱其家者也

再跋退翁溪堂集首詞並  
同其後畧有更改附錄於

下

又書溪堂集後

四朝國史於遺逸中立俞退翁傳大槩用孫革老所作  
墓表惟自西川召爲御史力辭不拜墓表但云以闕員

召傳乃謂王介甫藉其清望使擊故老夫清德安肯妄發介甫用人寧不察此竊疑滕元發嘗倖湖州退翁郡人熟知其賢觀所贈詩帖即可知矣當熙寧元年神廟待元發方厚擢爲中丞合舉臺屬退翁之召必以其薦是歲十二月元發改翰林明年春介甫得政素惡元發出之于外知幾而退是乃所以爲退翁况舉主補外自應視以爲去就耶墓表不書其由莘老亦嘗攻元發故也退翁子孫甚盛且多顯者今其元孫徵入爲廷尉屢

更麾節純誠厚德克世其家因示溪堂集附此說於後  
使來者有考焉慶元庚申二月己卯

文忠集卷四十七

欽定四庫全書

文忠集卷四十八

平園續稿八

宋周必大撰

題跋

題曾逮侍郎戒其子崇清廉帖

漢華陰楊氏自高帝時喜以功封赤泉侯其後敝相昭  
帝傳至東京而震益顯遂爲名族大要以清白遺子孫  
子孫亦能守之四世清德之褒見于孔北海疏殆與兩

漢相爲終始何其盛哉本朝贛州曾氏儒素相承弟兄俱上禁途至文清公乃用此易其名是生仲躬出藩入從受知孝宗方季子出仕之初援古證今誨戒諄諄無非清白之訓是豈教咸諂者惟能世濟其美不隕其名則將與國咸休永世無窮矣慶元丁巳十二月

跋撫州游祖武楔帖

某與家兄子中自少喜收法書前後得右軍楔帖共以十數計此軸游氏所藏謝脫拘束而動容周旋如印沙

泥無不愜當筆意變化妙入神品蓋傳于今者惟定武瘦本最佳此其一也慶元丁巳臘月丁酉

跋楊廷秀所作胡氏霜節堂記

清風嚴霜本不相爲謀兼二美者竹也友人楊公廷秀平居薰兮慈仁真可解愠臨事則勁節凜然凌大寒而不改名堂作記曲盡竹之情狀蓋身之非假之也今胡氏旣知不可一日無此君其可三日不讀此記乎慶元丁巳

跋唐子西帖

眉山唐子西之文盛傳於世不待贊也史稱其論事精密通於世務爲宰相張天覺所知歷宗子博士提舉京畿常平貶惠州數年歸蜀而卒有子曰文若字立夫一字仲懿寬厚秀傑文辭高雅不妄與人交而襟懷灑落人自愛之登紹興五年進士第屢被薦召多仕於蜀二十六年入爲光祿寺丞遷秘書郎擢起居郎執政有惡其不下已者諷言官誣以事出知邵州改饒州除直敷



文閣從温州三十一年參知政事楊椿薦之高宗笑曰  
今不傲否蓋或言其簡伉也以宗政少卿召再爲起居  
郎明年二月進中書舍人兼脩玉牒官隆興元年以足  
疾求去正月丙辰除敷文閣待制知漢州明日改江淮  
都督府叅贊軍事符離退師例貶秩二等求出幕得鼎  
州徙江州病丐祠二年某月卒於南康軍年六十晚號  
遜菴初爲鄱陽破豪民一族人稱其政後與郡人王樞  
密剛中通婚因卜居焉在朝廷若不與事間出議論輒

平正無向背高宗將內禪懲靖康吳敏輩自以爲功未嘗語人宰執亦不敢問獨立夫請對言不宜迫遽高宗諒其忠與詳論舊事會御批追崇皇太子所生父立夫已書黃因過共歎聖德不可及而疑名稱未安歸白宰相請更黃而堂吏執不可立夫請不已宰相以聞改稱皇太子所生親尋詔侍從臺諫就御史臺會議遂稱皇兄而加贈極品其端蓋立夫發之立夫素主民兵或疑其迂雖予亦不謂然及守九江適邊騎犯舒立夫叅用

民兵備禦整暇方督匠刻東坡集人賴以少安其治郡  
能盡僚屬之才人皆樂爲宣力至簿書期會則不屑性  
既寡合遇所喜形迹都忘平生不言人過雖有憾亦容  
之常曰觀人以初見爲定徃徃十得六七少因讀史悟  
性理宣州僧宗杲及與子西並游張天覺之門名震一  
時立夫適相遇於荆南先語其子云我今謁杲彼若叩  
我我便不服杲望見立夫遽曰尊公文章滿腹却欠此  
事君從何處得來立夫喜且服人兩奇之子輅字德輿

亦能文進德壽宮古賦後省第入甲等乾道中由大理司直出通判漢州淳熙十三年冬提轄樵貨務高宗上僊獻嘖議謂合稱祖破禮官之說又及巷市七日事孝宗下其議會御史察洪翰林邁首議稱祖非是洪家居待罪孝宗曰議禮如聚訟何嫌異同於是禮官併疏輅失言給事中亦乞罷輅復通判隆興府予嘗與立夫同僚相善又惟文士子孫能世其家如唐氏者未易多得故傳其事于上舍游君所藏子西帖之後使脩史者有

考焉輅今爲利州守慶元戊午正月乙卯

跋韓子蒼與曾公衮錢遜叔諸人倡和詩

崇寧大觀而後有司取士專用王氏學甚至欲禁讀史作詩然執牛耳者未嘗無人凡紹興初以詩名家皆當日人才也今讀韓子蒼與錢遜叔曾公衮等臨川唱酬略可觀矣或疑所以然子曰舉子在場屋爲學不專爲文不力旣仕則棄其舊習難乎新功有志之士其操心也專其學古也力譬之追風蒲雲之驥要非繩墨所能

馭故子蒼諸賢往往不由科舉而進一時如程致道呂居仁曾吉甫朱希真皆是也其又奚疑慶元戊午正月戊午

又

國家數路取人科舉之外多英才自徽廟迄於中興如程致道呂居仁曾吉甫朱希真詩名籍籍朝廷賜第顯用之今觀曾公衮錢遜叔韓子蒼諸賢又皆翰墨雄師非有司尺度所能得也紹興初星聚臨川唱酬妍麗一

時傾慕邵之名勝游氏襲藏此卷有年數矣慶元紀號之四年歲在戊午上巳日周某子充敬題其末

跋蕭氏祖長官告

右武寧蕭長官所受淮南吳氏告一通按路振九國志楊行密之子渭自吳王僭號改文散官大夫爲大卿御史大夫爲御史大憲明年渭殂十一月弟溥嗣位改元乾真實後唐天成元年也徐溫旣死子知誥起復秉政其歲月職制皆與此告合予聞蕭氏自武寧起家至曾

孫諱定基字守一本朝天禧三年登第嘗任侍御史風節凜然有孫諱服字昭甫元豐五年登第擢監察御史時相蔡京憾執政劉達背已窮治達姻家章氏私鑄獄於平江久不能決昭甫奉詔審鞠不如京旨遂坐廢錮後起爲吏部員外郎出知蘄州卒再世以直諒聞號廬陵名族祿仕不絕武寧七世孫武陵丞諱許字嶽英才具過人余嘗與之游諸公方欲薦用俄謝事去議者惜之因其子特起出示祖告併題於後慶元戊午上巳



跋蕭御史殿試真卷

右天禧三年蕭公廷試三題卷一日之間文不加點項  
在館閣同僚許克昌狀元出其從祖安世治平四年魁  
卷與此畧同蓋祖宗時士人業精于勤徃徃習慣如自  
然非若後來之鹵莽也家狀曾祖霽不仕而其裔孫尚  
藏淮南吳乾貞中任武寧縣令真告豈以爲僞官故不  
書耶或疑賦原韻不當押業之法按廣韻入聲二十一  
洽與三十二狎通用三十三業與三十四乏通用自唐

迄天禧皆然此舊韻也仁廟初詔丁度等撰定集韻於是移業爲第三十二而以狎乏附之此今韻也慶元四年上已

跋宋運判昞奏稿

右故廣西運判宋公奏章四稿公以紹興二年二月爲衡陽太守當孔彥馬友曹成諸劇賊破城侵境之後黎庶凋瘵百孔千瘡官軍征戍日夜徃來資糧靡履應酬無虛日而能悉心撫摩臨事整暇奏課遂爲湖南第一

四年三月代還此陛對所陳也如乞諸郡置將乘時和  
糴與夫鞭策諸將早圖恢復皆中興急務深契高皇之  
心畀以使節將試用之攬轡踰年奉祠遽歸沒於臨川  
二子子伋子儵仕皆弗顯其孫文祚等得此遺墨俾某  
識其後公之守衡也舅氏王公藉實貳郡事奉外祖母  
衛國太夫人在又叔父靜江府君侍祖母秦國夫人宰  
屬邑之安仁某時年七八歲侍先夫人省秦國于衡尚  
能記公之政今追書大略如此公諱昞字景融蓋鄭國

元憲公曾孫而外祖母之姪於先大人爲表兄云慶元  
戊午三月十七日

跋張忠獻公與外舅帖

張忠獻公忠君憂國勸學爲善之心造次顛沛未嘗少  
忘凡見於手書者皆是也近世浮辭繆敬盈于尺牘觀  
此得不見賢思齊乎茲八幅者外舅御史王公彥光紹  
興庚辰守公鄉郡及移瀘帥答書也德人士風之褒期  
待甚厚蓋聞名于過平江之日知非溢美外舅李子嘉賓

藏之有年今傳其子紹祥而屬其題其後慶元戊午五月庚辰

跋義靈廟碑

義靈廟者滕侯棲神之所也侯宣和間掾天台適方寇  
鴟張初爲曲突徙薪之計後收焦頭爛額之功正使二  
千石智勇過人未必兼此二者孰謂一戶曹乃優爲之  
當時祠享永世廟食宜哉慶元戊午五月丁巳

題聶倅周臣所藏黃魯直送徐隱父宰餘干詩

稿

山谷此詩今載外集不觀初草何以知後作之工老杜  
云陶冶性情存底物新詩改罷自長吟孰知二謝將能  
事頗學陰何苦用心苟作云乎哉慶元戊午歲戊午月  
戊午日平園老叟周某書而歸之聶氏

跋江氏舊書

右安陸江氏書一卷頗有誤字首印江元叔書籍記末  
用越州管內觀察使之印不知元叔守越時錄本或錢

氏舊書也子孫不能守多入鄉人翰林學士鄭獬毅夫家贛州興國主簿余鏞得此以遺予乃錄毅夫鄖溪集所載記文於後慶元戊午歲戊午月戊午日

跋黃山谷書唐人詩

右山谷大書一軸紹興末外舅御史王公彥光守漢或帥瀘時得之今將四十年其孫紹祥携以相示昔山谷謫居多作字以遺蜀人中興後凡東南士大夫之爲監司郡守者徃徃有所獲而歸歲月旣久遇其良輒取之

郡無留良焉詩不云乎尚有典刑慶元戊午五月十四日

跋張芸叟劉滄詩

右浮休張公劉將軍墳廟詩一首將軍諱滄慶歷名將力戰城水洛蕃漢皆畏愛幾爲狄青尹洙所害故云生前毀譽豈堪聽身後功名始汗青此詩雖載畫墁集亦潛其名故表而出之慶元四年六月旦張公曾孫繼祖携以相示爲題其後



跋司馬文正公手鈔富文忠公使北錄

司馬文正公於廣記備言不啻飢渴之嗜飲食况國家  
重事乎富文忠使北語錄首尾萬有餘字手自鈔錄他  
人安能爲此淳熙癸卯公曾孫吏部侍郎季思刻石泉  
南屬某題其後今十六年而侍郎之子遵求踐宿諾感  
歎不已某昔爲太史牛馬走恭讀徽宗實錄宣和六年  
春旣獲夔離不得慶歷國書誓書真本藏寶文閣朝廷  
以爲快祖宗累世之憤則富公奏牘所謂影帶下策益

用之矣當時力辭奉使賞抑有由也慶元四年六月十

一日

題東坡上薛向樞密書

薛恭敏公元豐元年九月自樞密直學士工部侍郎知  
定州召入西府蘇文忠公昔嘗與之論天下事今復貽  
書深切著明如此責善爲有加矣薛本以理財論兵進  
及在政路首尾三年同列質以西北事則養威持重未  
嘗啟其端最後詔民蕃馬旣奉行復欲反汗爲舒亶論

罷聞義能徙不善能改未必不因蘇公之書比夫患失  
遂非者有間矣元祐間特被褒表豈無所自耶公作此  
時年四十三是日其生朝也身爲二千石士民當盈庭  
爲壽否則與家人飲食燕樂乃齋心呵凍極陳國計其  
賢於人遠矣官本不載此書于集惟麻沙本及別集有  
之故人劉錢壽使君之子宗奭兄弟家藏真蹟慶元戊  
午七月旦以示前進士周某敬題其後

跋楊廷秀贈族人復字道卿詩

江西詩社山谷實主夏盟四方人材如林今以數計未  
爲多也誠齋家吉水之湓塘執詩壇之牛耳始自家族  
延及郡邑孰非闖李杜之門希歐蘇之蹤者粵無罇燕  
無函秦無廬胡無弓車夫人能爲之尚可以社名乎家  
生執戟郎又拔乎其萃者也慶元戊午七月二日

跋曾氏兄弟帖

贛州曾氏兄弟俱有時名其以文章議論致身禁從者  
三顯謨學士字叔夏寶文待制字天猷敷文待制謚文

清字吉甫建炎紹興三十年間並歷春官長貳可以知其  
人矣文清公二子大理卿字原伯戶部侍郎字仲躬  
同事孝宗克繼先業視南豐之曾殆庶幾焉仲躬子德  
廣守桐川哀兩世翰墨刻之石蓋將對手澤而思永君  
子之澤即心畫而推廣前人之心濟美象賢寧有既耶  
附以呂伯恭禮部君二帖深有益於學者乃知五公義  
方之教施及宅相何其盛也慶元戊午八月丙寅朔

題呂侍講希哲歲時雜記後

本朝承平歲久斯人安生樂業凡遇節物隨時制宜雖有古有今或雅或鄙所在不同然上而朝廷次而郡國下逮民庶靡虞熙洽未嘗虛度則一也侍講呂公當全盛時食相門之德旣目擊舊禮又身歷外官四方風俗皆得周知追記於冊殆無遺者惟上元一門多至五十餘條百年積累之盛故家文獻之餘茲可推矣慶元戊午秋公之玄孫仙遊邑大夫祖平以示平園老叟周某竊有生晚不及見之嘆云

自題與黃談書尺

元祐給事中黃公夷仲之曾孫諱談字子默山谷先生  
從孫實傳詩社之正印有文集三十卷自號澗壑居士  
早受知於胡明仲侍郎其後劉共父樞密張安國舍人  
繼帥湖南皆爲上介屬以文翰人門具美宜在朝廷而  
官止權務壽不及知命識者惜之嗣子早世其孫鈞以  
予隆興乾道間往復之書數十通聯爲大軸銜袖相遇  
內十四幅乃予手筆餘皆弟姪及筆吏代作今三紀矣

追懷人物之英豈易復得重爲歎息慶元戊午九月己亥

跋撫州鄔處詩

臨川自晏元獻公王文公主文盟於本朝由是詩人項背相望近世如謝無逸幼槃兄弟及饒德操汪信民皆傑然拔出者也南渡以來又得寓公韓子蒼呂居仁振而作之四方傳爲盛事其後儒冠則曾季狸裘父釋氏則文慧大師惠嚴道士則黎道華師侯同時以詩名人喜稱之今鄔君文伯復以科舉餘力刻意吟詠橐其新



舊稿遠以相示予雖不能詩然亦知爲佳作也蓋木有本可以干霄水有源可以至海以君之才進而不已追前人而與之齊斯無難矣慶元戊午九月戊申

跋山谷草書太白詩

南豐譔氏收山谷草書李太白歌行一卷殆中年筆也予家藏數卷亦太白詩蓋非謫仙妙語不足發龍蛇飛動之勢耳今江西豫章廬陵宜春皆剋山谷真草惟蜀中劉氏十卷中草聖尤奇實暮年筆也始穎昌劉昱字

晦叔與山谷友善暨其子璫孫伯虎三世相繼持節於蜀日裒月聚固宜得之之富其間二說學者不可不知乃命小史錄於左慶元戊午十月丁亥

題戊午歲吉州舉人期集小錄

選士於里登名天府爲之首者期集同舉之人禮也廬陵號士鄉故此禮尤盛而今歲特盛焉求新左君淳熙己酉裒然居萬人之上今秋克復舊物而其父母年方五十餘二者皆近所稀有其盛一也誠齋楊公龍泉孫

公朝廷鄉黨之達尊交以序美之其盛二也每舉士或有故不至至或不多多者什僅三四今在坐乃五十人其盛三也左君既具著於錄而附以坐客所賦詩強予題其後老諄雖不能措辭竊有祝焉國朝天聖八年春參政歐陽公以國學首薦冠名南宮是年廷試榜眼則丞相劉公其後鼎甲則侍郎郭公中興第五則資政胡公至紹興十八年參政董公遂唱名第一其他登甲科猶未悉數也諸君勉旃踵前賢之高躅增吾邦之盛事

其在茲行乎慶元四年日南至

跋張如瑩歸去來辭

永嘉陳開祖紹興二年登第張公子韶雅重之仕至廣  
德太守行誼表於一鄉廉靖著於仕途其倅豫章戶部  
尚書張公如瑩以慶遠軍節度使來爲連帥素以翰墨  
馳聲位望旣崇益自珍貴人欲其尺牘不可得獨爲開  
祖書歸去來詞於畫卷且推美其古雅今五十年而開  
祖之子求仁請予爲之跋求仁三爲劇邑以名字再典

郡予嘗同僚知其端諒通達蓋名父子也開祖諱一鶚  
求仁名自脩慶元五年正月十九日

跋王才臣十史論

淳熙中余備數政府故人劉子澄守衡言布衣劉德孝  
之才孝廟亟命以官食衡祠祿因思予友王才臣才學  
不啻德孝甚欲以名聞顧念才臣春秋未甚高猶當以  
科第進遂不果後歸老里中才臣猶在塲屋偶見孫從  
之跋其史論爲之悵然才臣身雖益困而所養益厚異

時會當有知之者予老矣尚庶幾及見之慶元五年上  
巳日

書譚談樂府後

世謂樂府起于漢魏蓋由惠帝有樂府令武帝立樂府  
采詩夜誦也唐元稹則以仲尼文王操伯牙水仙齊牘  
沐雉朝飛衛女思歸引爲樂府之始以予考之乃賡載  
歌薰兮解慍在虞舜時此體固已萌芽豈止三代遺韵  
而已新喻譚談居之舉業餘暇作上之回等十四篇因

舊題而衍其辭用意深遠至於擬古詠史詠懷感遇諸詩多有佳句進而不止前輩可以企及爲題卷末而勉

之慶元己未五月戊戌

韓文公集云雉朝飛牧犢子作吳兢樂府古題要解以爲處士

犢木子劉次莊樂府集序又作犢沐未知孰是

### 題宋景晉贖手書佛經

待制宋公手書金剛經端謹有法度始末一體如摹印然敬之至也王荊公學王濛書多爲橫風疾雨之勢每作帖初尚矜持後必坦率惟寫佛經專用楷法亦是理

與公以紹興己未五月書此其曾孫曾老以慶元己未五月示周某甲子適一周矣

題清獻公三帖

右趙清獻公三帖第一乃嘉祐八年春任度支副使所作其云孫公勇退謂蜀人文懿公也名與公同尋除東宮三少致仕屹公長子是年登科第二則治平二年公知成都時仁舉不知謂誰三年有都官郎中廣濟河催綱石輅爲梓州路運判或斯人與第三云呂侍講三請



留司蓋正獻公也是年八月出知蔡州慶元五年十月  
旦平園老叟周某敬題

題楊廷秀新淦胡氏義方記後

誠齋作義方記理勝而文雄殊無老人譚諄衰弱氣象  
吾黨所共矜式豈特光賁胡氏家塾而已慶元己巳十  
月辛未

跋東坡與張近帖

右坡公與張幾仲帖蓋元豐間謫黃時也所謂授德興

尉者長子邁也其將自黃移汝嘗賦長篇以銅劍易幾  
仲龍尾子石硯幾仲作詩送硯反劍公子屬和卒以劍  
歸之具載集中幾仲名近仕至顯謨閣直學士國史有  
傳其從孫子侑家臨江軍實藏此帖慶元己未十一月  
甲辰周某子充敬觀

文忠集卷四十八

欽定四庫全書

文忠集卷四十九

平園續稿九

宋周必大撰

題跋

大元帥康王與向子諲咨目及御筆等跋

臣竊惟靖康大變地裂天傾泥塵已蒙鄙壇未設餘分  
閨位人懷向背惟世臣向子諲首符所部拘僞楚之族  
數遣行人及仲子澹詣大元帥府議軍國事領兵戡難

見褒爾書謹仲嚴備復勤親札此權發運副使時也胡  
行鬼速漢箭無神金城湯池所在宵潰江湖諸郡送款  
相望子諲獨鳩叛餘之兵嬰十里之城八日然後失守  
汪藻撰撫恤官吏軍民勅書有曰明于義分屬此艱危  
巧說百端堅持一意力爲巷戰奮以忘軀此還長沙時  
也御書薌林泛宅古文孝經臨蘭亭序拜賜不一此爲  
浙漕時也國步已安春秋猶盛禁途輔郡倚注方濃上  
書請老留之不可特頒詔諭遠比漢疏侍從挂冠鮮有

是禮此守平江時也向非忠誠慷慨心在王家始終不渝安能致上眷如此雖疾風草勁向日葵傾聖鑒昭昭屢形獎飭然責賢必備求全或毀時當多故傳聞異辭其孫士虎懼後人猶惑也敬裒奎畫刊之樂石謂臣昔以太史牛馬走逮事高皇俾書下方或可傳信恭惟一字爲褒榮於衣服衆言淆亂折諸聖人今觀天文議論定矣慶元六年二月旦具位臣周某某謹書

跋朱元所作南城吳氏社倉記

某遭遇孝宗皇帝陪貳府者十年每歲必聞宣諭云朕自中春農事興即憂水旱直至十月米穀上倉然後放心洋洋聖謨二帝三王所未有也方社倉畫旨時某在東府實奉宣德意下之有司今南城吳伸吳倫兄弟請書此記并敬載聖語於後當有告於太史氏者具位周某書

跋山谷題橘洲畫卷

橘洲在湘江中巨浸不能沒膏潤宜橘是以得名唐張

曲江杜子美劉夢得皆見於詩又畢田序云橘千餘本  
居民數百家佛刹神祠馬氏書堂詰盜官舍在焉張舜  
民記洲南北與州城等有巡檢寨及僧寺兩三所漁者  
數百家予比歲嘗至其上不復曩時之盛今觀山谷所  
題畫卷亦似疑其畧也橘訣律切吉激質切本作兩音  
比人混而爲一故酈道元注水經橘洲或作吉字近世  
僞傳東坡錄橘傳亦指爲吉五方音訛多此類予以舊  
游故詳記之慶元庚申二月乙丑平園老叟周某書而

歸之趙仲肅

題東坡晚年手帖

東坡以靖國辛巳北歸五月由金陵過儀真二十九日  
手簡別發運使屬官六月自潤還常州七月仙去此乃  
數旬前帖尤可貴也趙仲肅以示周某敬題其後慶元  
庚申二月乙丑

跋歐陽文忠公與張洄書

右歐陽文忠公與張洄手書五帖洄字仲通開封人晁



無咎雞肋集有傳任潁州推官文忠實爲守甚重之皇  
祐三年從晏元獻公辟於長安文忠時守南京答第一  
第二書其送行長篇今載居士集第五卷明年文忠丁  
母憂歸潁答第三書至和元年洞以大理寺丞再從晏  
公於西京而文忠初服闋還京師答第四書嘉祐六年  
文忠在樞府而洞以秘閣校理出守棣州答第五書次  
序皆可考其後又爲三司度支判官歷江西淮南轉運  
使官至工部郎中治平四年卒此帖藏玉山汪季路家

慶元六年閏二月己亥

書馮頤自得集後

紹興辛巳三月余任秘書省正字被差充公試補試類  
試考校官時仁和縣丞馮頤子長來主管試院諸司開  
院與之款偉岸而文自言系出文懿公意甚奇之蜀人  
劉詒美侍郎負才擇交亦稱之不容口後二十餘年君  
爲朝散郎京西安撫使司叅議官出所著書三卷名曰  
自得上論經旨十六事中爲史評二十二下則詩話四

十六其推明聖賢之意考訂古今之說徃徃出人意表  
今詩匠楊廷秀待制嘗序君詩謂清麗入江西深長幾  
唐人則學問文章從可知矣年八十而終慶元庚申春  
其子從政郎有年自循州理掾奉母還嚴陵過予話舊  
感歎不已書此以遺之慶元庚申閏二月丁巳

跋黃魯直帖

山谷以紹聖元年冬坐史事安置黔南二年四月至焉  
其年三月朝奉大夫錢塘韋驤字子駿來爲夔路提點

刑獄嘗任主客郎官故云予駿提刑主客大夫四年三月宗正丞張向除本路提舉常平實山谷之外兄乞避親嫌十一月移戎州五年六月改元元符方抵貶所其云從道者向也此十帖皆與驤者是歲九月驤移知亳州未上易四明本名驤皇祐五年登第後避濮王諱改焉臨汀有文集蓋其孫作守時刻之慶元庚申三月戊寅書而歸之汪氏

跋蔡君謨與唐詔帖

右蔡忠惠公與唐詔帖十二紙詔字彥範龍圖閣待制  
肅之子侍讀詢之弟錢塘人其云厚之新得書蓋指浙  
西轉運使元絳此至和二年公守泉時又云清源若移  
動謂自泉移福及再知泉州時打牒過歲則嘉祐五年  
召入翰林知開封時也皆當置之卷首文字繁冗帖累  
辱降訪帖前日偶出帖乃嘉祐六年四月權三司使以  
後所作按闕仁錄是年八月以江東運判尚書比部員  
外唐詔爲權發遣三司開拆司十月改權發遣鹽鐵公

事殆公所辟置耶詔之在職嘗經憂惱故公自言頃歲經由衢州因抱骨肉之戚至泉遂病以解釋詔使之入省仍勸其止市戶祭奠又每達老親之意於其家人可謂親密之至者也先後偶失序略爲之辨而歸之汪季路氏慶元庚申三月甲戌

書歐陽彞四世碑

古者官有世功則有官族著之譜牒百世可考雖然引而伸之存乎其人若樂邵胥原孤續慶伯之後失其先

業則降在皂隸者多矣友人歐陽彞字元鼎世居廬陵  
郡之永和鎮今爲族長儒學行義表表一鄉其家世甚  
遠未暇徧舉姑以近數世言之贈奉議郎諱登字大明  
者高祖也左朝散郎通判澶州諱粲字景文者曾祖也  
祖諱璟字粹明父諱襄字允成俱業儒允成少年貢于  
鄉遊京師之太學不幸再世俱不及下壽肆其子孫日  
以蕃衍與貢籍登科第者相望其興特未艾也自奉議  
而下墓刻多先達名筆元鼎既衰四世拓本聯爲卷軸

又取近族之隱德者登科者死節者別爲一編於是歐陽氏之源流開卷可知傳不云乎世濟其美不隕其名此元鼎紀先烈詔後人之本意也乃爲表而出之慶元六年三月既望益國公周某書

跋富鄭公與李中師帖

朱元晦跋云李事公不爲不謹公待李不爲不厚晚乃觀望時事以公同編戶出免役錢反覆如此四朝國史李中師本傳言中師在河南治辦深刻厚結



中人神宗嘗稱其治狀富公爲相奏曰陛下何從知之  
帝默然中師平昔事公謹者望其薦已聞公此對勢應  
匿怨後與編戶同敷役錢聊以逞憾非但徇時而已公  
遇李厚于私覲或不能免上前臧否自有公論遑惜小  
人怨乎慶元六年三月甲戌

題所書劉辰告墓碑橫石

乾道庚寅秋予初直北門爲同年辰告君作墓碑又屬  
兩同年朝士書丹題蓋今三十有一年而君長子贊暨

兩弟耆孫吉孫請予別書此文欲以橫石刻置家廟義  
不可辭贊即名孫也以夢更今名甚文而才克肖父祖  
自淳熙辛丑至慶元己未再上南宮立身揚名其在茲  
乎宜孫亦負雋聲嘗兩貢於鄉與闕孫偕亡矣六年庚  
申五月旦某書

跋顏魯公帖

右顏魯公帖凡四行二十六字或真或臨不能辨也第  
一第二行盡處各減一字惟公忠烈嶢然千載猶有生

氣况覩遺墨起敬謂宜如何按永泰二年歲在丙午公  
奏宰相元載抑塞人言甚于李林甫楊國忠載怒因公  
論祭器誣以誹謗二月乙未由檢校刑部尚書知省事  
貶峽州別駕未至易吉州司馬所謂南來諸事互減一字正  
此時也先是漢州刺史崔旰陷成都蜀中大亂公貶後  
十九日癸丑紹興元帥兼劍南東川節度張獻誠就近  
討旰三月戰梓州獻誠大敗僅以身免所謂不了國事  
殆指斯人張真之下闕文疑稱其字蓋誠貞義相通耳

初獻誠陷安史之亂將兵守汴後拒朝義以州來降與公俱奮忠義者故公賢其人念其敗云爾此帖當是公赴吉或到官所作自丙午歲距慶元六年庚申凡四百三十五年而臨川梁世昌寶寶藏之遠來求跋考唐史永泰無二年蓋是歲冬至改元即稱大歷元年至三年八月公自吉移刺撫州六年書麻姑山仙壇記今年三月戊寅夜山之仙都觀大火焚蕩幾盡古杉星列亦隨飛煙衆碑皆斷裂雜瓦礫中獨公壇記歸然其傍祝融

回祿曲意護持如此故併記其異爲後世忠臣之勸十月甲子周某記

跋張安國與弟伯子家書

士大夫尺牘施之尊貴未免矜持用之交游容或假借若乃行草得於肆筆獎勵發乎真情舍羣從家問何以哉觀此五帖則故紫薇郎之墨妙今太常伯之早成何待贊也憶乾道壬辰夏道由池陽太常伯之尊君持節在焉晤言累日其論難進易退學道愛人皆可書而誦

也施及賢嗣立朝濟世美涖官守家法義方之教有自來矣茲用表而出之庚申秋社平園老叟周某題

跋山谷書文賦

右山谷元豐壬戌歲年三十八宰太和縣書陸士衡文賦及半興盡而止以遺晁仲詢仲詢傳其親孫勝之尋歸廬陵王揚仁揚仁以遺太和嚴端禮端禮將刺置山谷舊治偕萬安郭澥求跋語昔王右軍距士衡屬耳已重其賦書之唐太宗時獨褚河南能辨右軍帖真偽愛

而臨其本至國朝藏蜀中李翹叟家元符間山谷自黔  
移戎見之謂豪勁清潤天下奇書益悟古人沉着痛快  
之語今觀此卷書法娟秀不減晉宋諸賢自足名世或  
乃疑山谷元祐以後每恨向來字中無筆遂謂四十年  
前書非其所喜殊不知前輩爲學日益新而又新晚欲  
自成一家豈遽矜夸滿假是殆癡人前不得說夢也慶  
元六年庚申九月甲戌

跋柳公權赤箭帖

唐柳公書當時自九重至外夷無不愛重史稱其結體勁媚蓋筆諫之意先形心畫此所以爲貴亦猶魏元成忠直而無媚耶後世真蹟日少賴石刻僅存典型予官行都有朝士楊文弼蓄公碑三十餘種徃徃來自西北其在東南者山南西道脩驛路記和州陋室銘贛州閑禪師碑台州國清寺額翠屏院天台佛三字題僧清觀簡及江州復東林寺碑耳東林近又煨燼或重惜之予笑曰趙明誠金石錄載何進滔德政碑在柳書中尤奇



偉政和間大名尹磨去別刊新製卮會至此殆不若東  
林之一炬也太和蕭知節示赤箭帖求余一言夫顏精  
柳骨古有成說此帖字瘦而不露骨沉着痛快而氣象  
雍容歐虞褚薛不足道焉昔歐陽文忠公最愛高重碑  
以爲摹刻之工鋒鉞皆在而蔡忠惠公則謂陰符經序  
善藏筆鋒柳書之最精者二說正相反文忠每推忠惠  
善書而云論若此不同况晚輩寡學乎宜擇良工刻石  
傳之以俟識者微知節儒雅好事其孰能與此慶元六

年九月辛巳

跋楊廷秀石人峯長篇

韓子蒼贈趙伯魚詩云學詩當如初學禪未悟且遍叅諸方一朝悟罷正法眼信手拈出皆成章蓋欲以斯道淑諸人也今時士子見誠齋大篇短章七步而成一字不改皆掃千軍倒三峽穿天心透月脅之語至於狀物姿態寫人情意則鋪叙纖悉曲盡其妙遂謂天生辯才得大自在是固然矣抑未知公由志學至從心上規賡

載之歌刻意風雅頌之什下逮左氏莊騷秦漢魏晉南  
北朝隋唐以及本朝凡名人傑作無不推求其詞源擇  
用其句法五六十一年之間歲鍛月鍊朝思夕維然後大  
悟大徹筆端有口句中有眼夫豈一日之功哉吉水羅  
惠卿之子且示公石人峯長韻讀之如身履羊贈耳聞  
班寅心膽震悸毛髮森聳詩能動人一至是即予懼夫  
不善學者欲以三年刻楮葉之巧而希秋花發杜鵑之  
神望公將壇竭蹶趨之非但失步邯鄲且將下墜千仞

故歷叙公真積力久乃入悟門證子蒼之知言慶元庚申十一月辛巳平園老叟周某書于華隱樓

題嘉祐賀老人星見表批答

宋元憲公五世孫梓示嘉祐四年正月仁宗朝批答樞密院官賀春分前老人星見表一通使副凡四人宋公爲之長故子孫得藏當時之批答觀所續之紙高下正與表同乃錄某玉堂雜記附其後知南渡以來百司失舊制多矣梓云人多以無御寶爲疑某告之曰詔書單

賜所以用寶就批元表之後何必寶也梓請併書之慶  
元六年庚申十一月二十九日

題趙清獻公帖

儒書釋書雖異而欲人求放心復本性則同皆因其所  
有諄諄然命之非強以外鑠也趙清獻公習與性成庶  
幾由仁義行宜乎造次必於是觀其與弟姪家問可知  
矣慶元庚申臘日平園老叟周某書而歸之季路汪氏  
題癸丑謝何同叔送羊羔酒詩贈尹德鄰

永豐尹直卿德鄰學富而贍於文有能詩聲紹熙癸丑  
補中太學生兼試問寢龍樓曉詩末句云書生憂國切  
幾白九分頭學官嘆服置名第一謁告還鄉屢枉佳篇  
今將叅學見索鄙句老諄無辭可措偶記頃在長沙有  
謝何同叔運判雪中送羊羔酒四韻後欲再賦以酒有  
浮蟻可押慕羶對未成而止今錄舊作請直卿爲足之  
若自有壓倒元白之句則九萬里風斯在下矣庚申臘  
月十七日

跋蕭氏敦節堂詩

徽宗朝名御史蕭服字昭甫吉水人坐不肯羅織吳門  
章綖私鑄獄拂蔡京意羈管虔州後起爲吏部員外郎  
出知蘄州卒年五十八嘗遇恩封其父汝奭字君保至  
通直郎所居有敦節堂本路提點刑獄張景脩作詩美  
之此廬陵名士彭史君諱醇字道厚政和初和篇也踰  
九十年堂壞而詩存蕭氏以歸彭公玄孫叔夜叔夜池  
飾藏之因爲詳記本末按四朝國史蘄州本傳初謫處

州今其玄孫祺出大觀四年印歷實貶虔州虔與處字  
畫偏傍異爾即今贛州吉之鄰郡近世即改虔爲贛史  
官不考耳嘉泰辛酉四月辛巳

跋陳瓘書

張文潛謂韓文公揭陽謝上表頌德近諛此非知言古  
人愛其身以有待不欲死瘴癘耳其後爲兵部侍郎宣  
撫鎮州甲士陳廷大聲數責賊帥視死爲何如今伯紀  
謂陳忠肅公跋敢疑論爲懼死時語亦非也蔡氏烈焰



燎原熒天乃直犯其鋒雖被竄斥辨論不已懼死者能  
之乎忠肅存心吾知之矣私史廢而宗廟尊朝聞夕死  
可也嘉泰元年四月壬辰廬陵宰黃伯庸以示邑人周  
某敬題其後

題山谷書大戴禮踐阼篇

大戴禮踐阼篇學者罕讀東坡妙語聞所未聞山谷翰  
墨世共寶之可謂三絕太和彭惟孝字孝求好古嗜學  
謀刻之石頗疑元祐甲戌四月改元不應仲春先云紹

聖竊意山谷或以仲夏書此誤作春耳六一先生集古  
跋謂鍾繇賀破關羽表當在漢延康庚子春乃作己亥  
閏十月唐羅池廟碑據書撰官當在長慶三年乃題元  
年立石世既盛行姑俟識者予於此亦云嘉泰辛酉四  
月丙午

題鞠城銘

李公麟字伯時堂弟縑字德素南唐李先主昇四世孫  
並登科隱舒城龍眠山里人李冲元字元中少年邁往

善論人物如壁共爲山澤之遊號龍眠三友元祐三年  
亦登第典獄宜春作鞠城等十一銘其賢可知汪公涓  
字養源被遇孝宗歷左司諫中書舍人蓋吏部尚書諱  
應辰字聖錫之兄嘗爲吉掾喻公子材爲書此銘五十  
三年矣子材即聖錫婦翁諱樛紹興初擢館職後宰懷  
寧避時相挂其冠晚起爲郎久之再致仕今其孫珪來  
爲酒官兼行掾事參前手澤服膺法戒矜式賢範謂予  
昔與乃祖及汪氏兄弟皆厚善請題下方詳記以告來

者嘉泰辛酉四月丙午

跋張子韶與陳朝彥序詞

張公子韶以布衣奉大對氣節凜然既登近班不改厥  
度久竄庾嶺之陰所養益厚益剛者也其告同年富沙  
陳朝彥及引楊中立溫柔寬厚之教以煉金爲喻朝彥  
剛正抑可知已學者讀蘇文忠公剛說於此不能無疑  
子謂二者皆是也舜命夔教胄子曰剛而無虐臯陶告  
禹曰剛而塞洪範曰沉潛剛克高明柔克蓋天爲剛德

猶不干時況在人乎彼無禮不可治民如子玉者不學其蔽也狂如六言者壹之而不沒如陽處父者或虐或塞或不知克之過也子韶所戒其在茲與若蘇氏則明言剛者必仁夫人至于仁剛不勝用矣不仁必害物焉得剛予故曰二者皆是也朝彥諱廷傑紹興癸酉自南康宰辟廣西經畧司幹官子韶時在南安以序及長短句送之乾道丙戌朝彥嘗除司農丞未上而卒其子希黯爲廬陵郡督郵出子韶真蹟敬題其後嘉泰辛酉五

月朔

跋養正堂記

右冀州養正堂記併與魯侯帖山谷爲北京教授時所作年方三十五自云比平時書札似差老勁明年調太和宰秋歸江南真積力久詞翰又非前比所謂九萬里風斯在下矣淳熙元年五月晦周某觀於宗人虞卿兄弟家

後二十八年歲在辛酉再觀此卷恍如隔世徒有波

斯匿王之嘆嘉泰改元六月癸未某書于平園明農  
堂時年七十六

題李彥平遺書後

孔子曰朝聞道夕死可矣是理也載于易繫辭雜出於  
禮經三代時佛教未入中國儒者於啟手足之際徃徃  
不亂此理素明也及漢晉以後釋教始行乃謂欲達死  
生之理非潛心釋氏不可故好之者心溺攻之者辭費  
盡亦反其本而已予與樂菴李彥平既親且舊知其非

逃儒而入釋者臨終超然自在如此殆聞道乎其子嗣宗等屢求一言發明遺訓敬題其後

跋曾無疑所藏二帖

范忠宣公心正氣和道全德備三復尺牘如見其人嘉泰元年七月癸丑周某敬題歸曾氏

余家藏石曼卿大書籌筆驛詩宛類顏魯公心畫今友人曾無疑又示其行草二十字絕似柳誠懸范文正云曼卿之筆顏精柳骨諒哉嘉泰元年七月癸丑



題曾南夫集序

曾公提舉生二子長伯和諱塤次仲和諱麓伯和生彌泰有子曰寅亮予既畀公集序今仲和之子曰瓌曰璉來求別本復書以遺之嘉泰元年歲在辛酉八月戊子某題

跋劉氏後隆堂詩

唐末楊行密奄有江淮國號吳吉其南境也郡人彭玠素強暴擅行郡事以兵屬永新劉公景洪欲挈城附湖

南馬氏公陽諾而實不從玕獨携部族奔楚邊陲晏然  
公不有其功退隱山林南唐既受吳禪厚禮招聘亦不  
應常曰吾免二國交兵活人多矣子孫當有隆者名其  
北山曰後隆生子諱煦煦之子諱素是生相國諱沆字  
冲之仁宗天聖八年進士第二人至和中拜相累贈曾  
祖太傅祖及父皆太師其居相位每務進賢歐陽文忠  
公在侍從被讒出守公方提舉脩唐史密奏留置吏局  
尋遷翰林學士今某藏富文忠公與公手書云每辱勉

以盡瘁鎮靜有所植立其如五年無補雖強自勉恐終  
負教誨北望恩館神爽飛越富公書辭如此公之薦進  
可知達賢者宜有後故其子諱瑾字元忠孫儻字寬夫  
仕皆至待制三世貴顯歷仕五朝後隆之名茲驗矣初  
相國兄弟四人其季贈金紫光祿大夫諱注生知蘄州  
諱璞蘄州生知大庾縣諱伸大庾生宜都令諱守柔字  
光祖復以後隆名先塋之新堂玉山汪端明聖錫桐鄉  
朱紫薇新仲廣漢張左司敬夫莆田鄭省元叔友鄉人

資政胡忠簡公及王敷文民瞻楊待制廷秀而下皆爲賦詩光祖之孫子純出以示予懼來者未詳知也故推本末遺之子純嘗舉于鄉進脩勤甚公侯必復尚其勉旃嘉泰辛酉八月癸巳

跋李伯紀青原詩

李伯紀丞相宣和中爲左史坐論京師水災斥去已負直聲靖康戒嚴定計城守雖不能解河東之圍然一時名望甚重高宗即位首用爲相惜乎輔政日淺規恢不

竟其後歷帥江湖厥有成效淳熙末諸子皆不在其姪  
申之進家集奏議請謚于朝孝宗似未悉其人余爲歷  
陳本末聖諭云張浚比與天監在上一言盡之有司請  
以忠定易其名制曰可今登仕郎曾佐出紹興初贈青  
原主僧師珪長篇觀其志趣亦壯矣同游向伯恭朱子  
發張恭甫仕未甚顯已而俱爲名侍從坐間議論必纚  
纚可聽豈止翰墨之勝乎嘉泰辛酉重陽日

跋董體仁帖

前賢遺帖士大夫爭寶藏之非獨慕其名亦以禮不浮  
詞不枝爲可法也近歲老成待後輩例稱契丈先達與  
新進皆用上覆否則訝其簡驪而不疑其侮段規也後  
世何觀焉今讀參政董公紹興末與曾彥及蕭長才帖  
雖視前賢交際之禮尚稍隨時其與數十年來足恭不  
情者相去已千萬里矣彥及名德廣長才名甲嘉泰元  
年九月彥及孫登仕郎忠佐請題其後

跋蕭臺詩

永嘉錢君文子序其曾祖姑蕭臺詩三卷刻板醴陵縣  
治復求跋語予觀詩三百篇有當時婦人女子所賦而  
後世文人或不能及蓋發乎情止乎禮義之難也景祐  
中歐陽文忠公序謝希孟詩云隱約深厚守禮不自放  
有古幽閑淑女之風欲引而進之衛莊姜許穆夫人之  
列請以斯言附諸卷末嘉泰元年九月二十四日

文忠集卷四十九



欽定四庫全書

文忠集卷五十

平園續稿十

宋 周必大 撰

題跋

跋文與可草書李賀金銅仙人辭漢歌

蘇文忠公謂亡友文與可有四絕詩一楚辭二草書三  
畫四世少知音惟予一見識其妙處又有詩云斯人定  
何人游戲得自在詩鳴草聖餘兼入竹三昧他日覩其

飛白復恨知與可之不盡況當百年之後不以蘇公之言求之可乎嘉泰元年降聖節書而歸之宗人愚卿兄弟

跋秦少章詩卷

右秦少章古律詩一卷宗人愚卿兄弟示予求跋昔東坡蘇公送少章詩云秦郎忽過我賦詩如卷阿句法本黃子謂魯直也二豪與揩磨謂其兄少游及張文潛也又云瘦馬識駉耳枯桐得雲和其見稱許如此今卷末

有和錢蒙仲越州見寄一首東坡益嘗次其韻云二子  
有如雙白鷺隔江相照雪衣明嗚呼少章詩名爲不朽  
矣嘉泰辛酉十月庚子

跋秦少章雜文

予少讀蘇文忠公帥杭時贈秦少章太息一首謂少章  
從吾游不及暮年而議論日新若將施于用者今觀其  
文三篇豈溢美之言耶嘉泰改年十月庚子宗人愚卿  
及二弟携以相過敬題其後

跋向子諲遺書

靖康二年二月半金人議以張邦昌帝楚三月七日受冊二十八日金兵方下城京畿運副兼淮浙荆湖制置發運副使向公子諲以是月二十六日牒廬帥馮詢及淮西提舉鹽香范冲令密察邦昌家屬聽大元帥康王之命是時邦昌尚未退聽而公憂國忘家明于逆順具存卽檢紹興二年胡文定公安國貽書宰相秦檜曰向某忠節在今日可以扶持三綱蓋指此也至八年檜再

相孫近李光並參政事公以徽猷閣直學士致仕列其事於朝十二月省劄下公開具繳申押劄子者三人也明年正月二十九日詔送吏館勅下禮部牒公照會牒尾侍郎馮櫟也今六十餘年而公曾孫公起以公手稿及省部真本范冲忠義相勉之書聯爲一軸將刻樂石傳之來世屬某題其後惟胡文定公以春秋學爲諸儒倡結知高宗其褒貶是非得聖人之公乃獨以扶持三綱推許向公其有功於名教昭昭矣贅言何益姑爲記

其歲月云嘉泰元年十月

跋蕭服劉逵唱和詩卷

觀中書劉公逵與蕭昭甫手簡及沿途唱酬詩軸則其相善可知矣二公傳載四朝國史未必家有其本錄以示蕭公四世孫祺使併藏之蕭公初謫虔州而傳以爲處殆傳寫之誤耶嘉泰辛酉十一月丙辰

廬帥靖康勤王跋語

宣和七年冬北兵入寇十二月十五日壬子徽宗得警

報遣內侍梁方平以七千騎守濬州舊將灌以萬五千  
騎守河而命節度使姚古爲京畿輔郡兵馬制置使兼  
都統制二十三日庚申有旨內禪辛酉欽宗即位丙寅  
詔畧曰金人犯邊諸道兵馬合入衛畿甸除沿邊守禦  
人外令京東京西淮南西浙帥司于正兵併不係正兵  
內精選驍銳及召募武勇委兵將官星夜部發赴姚古  
使喚明年改元靖康正月一日丁卯敵犯相州戊辰犯  
濬州方平望風奔潰灌在南岸焚橋而遁時白時中爲

太宰李邦彥爲少宰蔡攸領樞密吳敏知院事李稅同知耿南仲簽書所謂排難解紛不過羽檄召天下兵耳昔唐李德裕爲相請詔書付宰相司乃下自是號令明審本朝亦皆三省樞密畫旨處分今廬帥所被御前劄子五道雖或二府擬進然內大人直筆者書之用寶入遞大臣不與焉使當時有一德裕必不如此第一劄正月三日也至四日宰執欲車駕狩襄鄧中宮皇子已行因兵部侍郎李綱越次乞對面除右丞守城之議方決故



是日及五日無內批既而外攻內禦事勢益急故六日復催兵七日至再八日又催戰守雖備而敵已傳城相繼請和亦不暇督兵矣觀淮西所遣副將李齊以印狀具述到闕月日及帥臣劉偁跋語則竭力勤王大畧可見今偁曾孫復携以示臣臣蓋生於是秋謹太息流涕書其後嘉泰元年臘日

跋東坡秧馬歌

東坡蘇公年五十九南遷過太和縣作秧馬歌遺曾移

忠心聲心畫惟意所適如王湛騎難乘馬于羊腸蟻封  
之間姿容既妙回策如縈無異乎康莊是殆得意之作  
既到嶺南徃徃錄示邑宰予家亦藏一本然不若初本  
尤精李璿道潤之語庶幾得其髣髴今傳三家乃至嚴  
臨猶幸不出一邑所謂楚人亡弓楚人得之也近歲移  
忠姪孫之謹已譜農器成公素志予嘗爲之序其與禾  
譜並傳無疑矣璿字西美宣和中書舍人紹興四年守  
廬陵此必當時所題也嘉泰壬戌正月戊午

跋吳伸所藏留子固帖

南豐先生早從歐陽文忠公游素爲王文公所敬而與蘇文忠公友其門弟子則陳無已也今觀遺墨恨不執鞭嘉泰壬戌二月丙申平園周某書而歸之南城吳氏

跋尹焞帖

祁寬字居之紹興初佳士觀尹彥明過九江時所與帖其人可知嘉泰壬戌二月戊子平園周某題

跋脩楔序

唐太宗始得脩楔序命趙模韓政馮承素諸葛正搨本  
賜羣臣而虞世南歐陽詢褚遂良各自臨摹由是流傳  
人間今高宗皇帝臨定武石本則唐摹本亦亡矣皇諸  
孫臣善鑒好古博雅得紹興宸奎寶藏之屬臣某記其  
後臣嘗伏讀御製御書翰墨志近三十年而稱美此序  
無慮數四既曰測之益深擬之益嚴姿態橫生莫造其  
原又曰得右軍書手之不置自束髮喜作字晚年得趣

又曰右軍揮毫製序用蠶繭紙鼠須筆過媚勁健絕代  
更無凡三百二十四字有重者皆具別體之字二十許  
無同者歷代論書遂集大成方孝宗皇帝在王邸詔摹  
寫爲日課乃知二聖心書雖曰天縱亦積學之助也使  
羲之復生將云非恨陛下無臣法恨臣無陛下法耶嘉  
泰二年三月三日具位臣周某某謹書

跋汪達所藏東坡字

右蘇文忠公手寫詩詞一卷梅花二絕元豐三年正月

貶黃州道中所作昨夜東風吹石裂集本改爲一夜二  
月至黃明年定惠顓師爲松竹下開嘯軒公詩云喧喧  
更詆誚更字下注平聲而集本改作相詆誚嘻笑之下  
自添一聯云嵇生旣粗率孫子亦未妙今集本改作阮  
生已粗率孫子亦未妙按阮籍傳籍遇孫登與商畧終  
古及栖神導氣之術登皆不應籍長嘯而退至半嶺聞  
有聲若鸞鳳響巖谷乃登長嘯也嵇康雖有永嘯長吟  
願神養壽之句特言志耳其用阮對孫無疑某每校前

賢遺文不敢專用手書及石刻蓋恐後來自改定也水  
調歌頭題元豐七年三月二十五日黃州已刻石於公  
法帖第一卷遠方無良工失真遠矣浴室院東堂三絕  
句元祐六年六月作集本但添注遂良事歲月之序如  
此既內殿印銜幅不容輒易至于李杜佳句公常愛而  
錄之路難八句豈一時漏寫與老泉詩則家難也嘉泰  
壬戌三月甲寅東里周某書而歸之汪氏

題趙弁雪圖

趙弁祖文往至臨安諸公貴人愛之凡秘書省及夫新作政府所畫照壁多出其手迄今尚存觀此雪圖風度可想十六弟奇字祖頴紹興中屢爲監司王初察之壻文采似水清安靜有家法蓋其祖吏部郎諱偁東郡人元豐末知登州民宜其政元祐末以河北轉運使權中山府兩得蘇文忠公爲代故祖文祖頴字畫亦皆慕蘭云嘉泰壬戌三月甲子廬陵戶掾趙公括仲肅以示周某爲題卷末



跋山谷與孫端帖

元豐八年七月孫覺莘老自秘書少監遷諫大夫是年四月山谷以校書郎召夏秋間到京所謂子實名端孫公之子山谷先娶孫公女故從俗呼端爲大舅今集中有次韵寄秦少游并題寄寂齋二詩即其人也嘉泰壬戌三月丙寅平園老叟周某書歸之皇諸孫仲肅

跋胡邦衡奏劄稿

歲在戊申高宗策士淮海胡忠簡公年二十有七因御

題問治道本天道本民公首答云湯武聽民而興桀紂聽天而亡今陛下起干戈鋒鏑間外亂內訌而策臣數十條皆賢之天不聽於民又謂宰相非晏殊樞參非杜衍韓琦范仲淹既批逆鱗復侵當軸聖主獨察其忠擢置魏科是時直聲已著縉紳間後十年當紹興戊午以密院編脩官上書乞斬宰執時年三十七直聲遂震於夷夏尚有可諉曰年剛氣壯也已而竄逐嶺海去死一髮隆興初然後還朝攝貳夏官年已六十餘議論盡

少卑之今覽奏劄殘稿忠憤峻厲視戊申戊午反有加焉其孫知邕州槻將刻石傳遠見屬一言夫人之生也有血氣有浩然之氣少而剛老而衰血氣也衆人以之秉懿好德養之以直塞乎天地老少如一浩然之氣也忠簡公以之嘉泰二年四月

跋張德遠與胡邦衡帖

右張忠獻公與胡忠簡公帖或在廟堂或居遷謫或罹憂患無不勸人以學潛心於天所謂造次顛沛必於是

者今忠簡公家集亦有與忠獻九帖往往相應長孫槻  
守邕管宜併刻之嘉泰二年四月

跋陳少陽哀辭

陳少陽之死讀右丞許公哀辭思過半矣臨川梁光遠  
喜聞前輩遺事寄此求跋予有少陽行狀益其弟南所  
作今錄示光遠宜繕寫入軸以便觀嘉泰壬戌七月癸  
丑

跋包孝肅公帖

右包孝肅公自帥鄉部坐失保任降知池州與同年手  
帖一通惟公剛正之名至今播在人口國史本傳云性  
峭直然惡苛刻務重厚嫉惡雖至人情不及即推以忠  
恕未嘗僞色辭以悅人不爲苟合不作私書親舊干請  
一切絕之今觀此帖亦非絕物離人者也後有戒子孫  
石刻末云天禧四年五月男珙奉命勒石按公以天聖  
五年登甲科當天禧時公猶未仕而于數年前垂訓如  
此當考嘉泰壬戌八月辛卯平園老叟周某書而歸之

臨川梁克昌光遠

曾三異所藏盤松贊跋

德壽宮苑圃分四地分盤松在其北御製贊如右今太府丞張鎰以遺廬陵曾三異屬臣題其後臣嘗敬觀御製祭土地文爲此松也其全文云維淳熙五年歲次戊戌十一月日太上皇帝遣內侍張宗尹特設牲牢旨酒珍果香花致祭於本宮土地之神神有百職職各不同典司草木土事是供我遊湖園乃獲奇松植之禁苑百

態千容婆娑偃蓋天矯騰龍翠色凝露清音舞風醉吟  
閒適予情所鍾壅培封殖久或力窮烏鳥外擾蟻蠹內  
攻神其勦絕勿使能終精邪竊據盜斧適逢神其呵逐  
勿使遺蹤常令勁質坐閱隆冬堅踰五柝弱異雙桐歷  
千萬年鬱鬱葱葱牲牢旨酒嗣錄汝功尚饗今併錄以  
遺三異使寶藏之御書後一絕蘇文忠公軾詩也嘉泰  
二年八月二十三日臣周某恭題

跋魚計亭賦

徽宗皇帝宸文天縱最重內外制官非詞學俱優不在  
此選蜀人宇文公黃中以政和六年自右史除中書舍  
人既兼脩國史又兼詳定九域志又脩神宗寶訓八年  
言者疑公學術淵源蘇氏奉祠而去宣和二年秋上思  
舊人復還詞掖方且進用而公疑不自安明年以顯謨  
閣待制出知陝州又明年二月爲滎陽趙公獻作魚計  
亭賦引物連類開闔古今深得東坡穎濱之筆勢適有  
天幸出入侍從身名俱榮者俱好文之主也趙公字彥



思熙寧六年進士當元祐初英俊聚朝以奉議郎禮部  
編修貢籍首與孫逢吉彥同作職官分紀序後數年秦  
觀少游方繼之才名亦可知矣尋自秘閣校理遷太常  
博士知登隨商三州召爲郎出提點京東刑獄攝帥青  
社年五十九奉祠就養閒居二十五年其子諱暘字又  
若紹聖元年甲科大觀三年爲郎宣和四年知同州靖  
康中除少府監左右正言秘書少監建炎間直龍圖閣  
提點江淮路鑄錢子澤終朐山簿簿生渙終奉議郎通

判沅州二子蕃學問過人恬于進取連任獄祠居以詩  
名弟藏亦嗜學好脩有子曰适慶元己未擢第距熙寧  
已百年而家學不絕今藏得宇文公墨刻於兵火之餘  
求記本末於傳有之五世其昌並於正卿又曰世濟其  
美不隕其名請以是爲祝規嘉泰二年九月辛亥

跋梁仲謨尚書奏稿

紹興初高宗駐蹕臨安外禦強敵內綏疲民六宮百司  
事務紛至版曹帥漕鮮能稱職惟縉雲梁公仲謨迭處

三者治繁以簡轉難爲易士大夫徃徃比漢趙張唐晏  
異而已今觀奏稿近二十紙當敵來求成公數奏其情  
多詐昔與遼人戰爭議和至十有二卒墮其計今豈可  
不審旋詔遣歸朝遼人北還公引宣和靖康覆轍及近遣  
趙榮王威彼皆用之願爲龜鑑時論方倚張俊抑劉錡  
公乞令俊分兵進屯廬壽錡駐鎮江以備江陰許浦福  
山仍戒韓世忠臨敵持重至有二府不爲諸將所服檢  
發英斷毋失機會之語又乞召楊沂中速還爲行在不

測之衛又言秦丞相檜用闕原樓炤謀以川陝付胡世將乞選知兵者助之其他如准西不可棄捷報多失實岳飛宜以樞臣總師江漢劉錡既帥荆南當留部曲爲之爪牙至於諸路水災浙東經界擾民纖悉具奏不特此也十五年四月彗出東方秦自草赦文云永惟再造之邦當有惟新之政宜除舊弊用表中興方且矯誣遷就而公乃論政事失當左右前後不思所以答天心者盍依故事降詔求言此雖間兩社任言責議論未必敢

爾而公不以典郡廢論思獻納之義忘寢與食鬚髮爲  
白然後知高宗欲大用公益察其愛國憂國密裨廟算  
非專以才術過人也惜乎命有所制不能展盡底蘊肆  
其諸子或以文采或以治行自昭于世傳謂臧文仲有  
後於魯宜哉嘉泰壬戌九月戶部郎官總領淮浙軍馬  
錢糧季玘以示周某敬題其後

跋黃通老尚書奏稿

邵武簡肅黃公淳熙庚子年八十有五易簪之際自草

遺奏一通事之至大莫如故疆陵寢之未歸事之難言  
莫如進退人才之未善公極力披陳幾于千言援古證  
今無一辭淆亂平生學力茲可見矣其子衡州使君瀚  
以某與公接武禁途道同志合使題其後昔荀卿論成  
人云德操然後能定能定然後能應生乎由是死乎由  
是嗚呼公其有得於斯乎嘉泰二年九月

跋楊無咎畫秋蘭

鄉人徐丙字漢章博于學而贍于文示予楊無咎手畫

香草題曰秋蘭後有兵部侍郎章茂獻國子博士湯君  
寶跋語其說特未定也予老而學圃問諸園丁則曰春  
蘭夏芷秋蕙冬蓀葉莖花色及多寡徃徃不同予異其  
說徧以古書考之屈原離騷經紉秋蘭以爲佩張衡東  
京賦秋蘭被涯又思立賦幽蘭秋華曹植朔風詩秋蘭  
可喻潘尼贈河陽詩流聲馥秋蘭之類此言蘭以秋而  
花也屈原九歌春蘭兮秋菊

隋煬帝煙花  
注用此句

陸機庭中奇

樹詩歡友蘭時徃注春時也梁元帝詩春蘭本無絕唐

太宗詩春暉開紫苑淑景媚蘭湯之類此言蘭以春而  
花也宋玉招魂光風轉蕙汜崇蘭抱朴子春蕙秋蘭陸  
機悲歌行春芳傷客心蕙草饒淑景是蕙亦可言春矣  
本草圖經蕙七月中旬開花至香是蕙亦可言秋矣故


騷經曰蘭芷變而不芳荃蕙化而爲茅

說文荃荃同音  
文選以蓀壁爲

荃蓋合四者而言之湘君歌亦云薜荔柏兮蕙綢荃撓  
兮蘭旌湘夫人則並言蓀壁蘭橈蕙櫜芷葺司馬相如  
長門賦搏芬芳若以爲枕席荃蘭而茝香乃知四時香草



同出異名葉長青而花隨時自屈宋至漢唐皆于蘭蕙  
互言春秋豈特邵伯溫見聞錄證黃氏之誤而已然則  
園丁之言未爲無據所謂禮失求之野與嘉泰壬戌下  
元節平園老叟周某書



文忠集卷五十